

胡文忠公遺集

胡文忠公遺集卷二十五

長沙鄭敦謹

編輯

湘鄉曾國荃

請

旨革提違章徵收之知州疏

七年十二

月初六日

竊查湖北漕務積弊將及百年

臣於本年十月十四

日將漕務積弊已久亟應革除冗費減定漕章各情

形密摺奏

聞在案旋與司道督同武漢兩府悉

心籌議將通省漕務通盤核算刊示曉諭所有道府

漕規及上下各衙門一切房費差費概行革除所以

清弊之源也其州縣徵收漕米現在運河未通不能兌運改收折色按其向年浮收之數痛加刪減有較前減半者有減過半并減去三四倍者所有由單串票樣米號錢一切浮費概行禁革所以杜弊之流也臣猶慮各州縣陽奉陰違不能切實刪減密委知府丞倅分赴各屬宣布民間務使周知密查州縣是否照辦去後隨訪聞署荆門直隸州革職畱任知州方一向年該州漕米每石收錢六千八百文尙有由單腳步印紅樣米串票等費統計每石浮收錢八九千文不等此次新章每石減爲制錢四千八百文耗

米水腳串票雜費一併在內該署州於每石定價之外任聽糧差勒收由單串票等錢大戶每票勒收錢一千文二千文小戶每票勒收錢五六百文不等以致花戶遵照新章輸將踴躍者俱觀望不前卽查一州之大不下數萬戶若每戶勒收錢數百文數千文通計卽浮收數萬串不等膽大妄爲莫此爲甚又荆門州歷年陳欠錢漕甫經該管道毛鴻賓履勘稟緩尙未核定批准該署州於開徵時出示有歷年陳欠照舊輸將之語並將新漕卽作陳欠有楊姓一戶欠完咸豐五年六年糧米三斗七升糧書劉學文勒將

本年所完漕米折價叩作陳欠浮收錢九千四百一十八文查陳欠錢漕既經該管道稟請展緩該署州何得私收並將新漕折作陳欠是其私收陳欠既不稟明帶徵又復照舊浮收勢必以所收之陳欠充私糴而以託名之新欠抵批解居心尤屬巧詐貪鄙臣查湖北錢漕積弊自道光二十年後歲額徵不及半江陵監利等縣則自道光二十年後額徵不及二分而浮收之數則每石竟至二十餘千州縣書差恣意中飽日甚一日幾於不可收拾現當整頓漕弊嚴杜捏災之際若不從重懲辦何以除積弊而挽頽風據

藩司馬秀儒臬司羅遵嚴署糧道張曜孫暨該管道
毛鴻賓會詳揭參前來興臣訪聞無異查方先

因另案革職畱任相應請旨將署荆門直隸州

革職畱任知州方革任提審由臣發交藩臬兩

司提同書役人等嚴訊確實是否故縱書差需索舞
弊抑係授意營私貪婪不職按律定擬一面委員前
往摘印接署並查明任內倉庫正雜各項有無虧挪
另行辦理外所有署荆門州革職畱任知州方

縱容糧差浮收並私將新漕印作陳欠請旨革

任提審各緣由理合會同督臣官文據實臚陳恭摺

具奏

上諭胡林翼奏參知州縱差浮收漕糧請革任提審一摺
實屬膽大妄爲居心貪鄙方
著卽革任交胡林
翼提同書役人等嚴訊確情按律懲辦以肅漕政而儆
官邪欽此 十二月二十三日接奉

再臣於十月十四日將湖北漕務積弊已久現擬革
除冗費減定漕章情形密摺奏奉
硃批所奏實
屬剴切汝能不顧情面祛百年之積弊甚爲可嘉俟
辦有端倪再行具奏欽此欽遵與司道武漢兩府日
夜籌商令各州縣將向來浮收數目及漕規冗費據

寶開陳蒲加納減從前每石浮收錢十六七千十八
九千或二十餘千者今減至六千數百文或五六千
文浮收八九千文者今減至四五千文耗米水腳票
費一併在內其由單串票樣米號錢及雜項名目一
概革除統計有漕州縣民間共刪減錢一百四十餘
萬千文此向來官吏丁差剝之於民而今還之於民
者也州縣照減定章程徵收後北漕每石解正銀一
兩三錢耗銀一錢三分南米每石解正銀一兩五錢
耗銀一錢五分其較北漕多解銀二錢者緣南米係
供滿緣各營兵食遇有災緩不敷由藩庫籌款撥補

今藩庫款項支絀不能不就款預籌統計北漕南米正耗銀兩實應解糧庫銀四十一萬餘兩此向來以熟捏荒以徵爲欠不盡歸公而今實歸於公者也南米例支滿綠各營兵糈應均照例價每石折銀七錢尙餘銀八錢荊州滿營生計尤艱應於每年例放二百日本色之內酌加銀二錢每石折銀九錢尙餘銀六錢計其餘銀八萬餘兩撥入藩庫籌備撥補兵米及滿綠各營正餉又漕南水腳銀每石一錢五分計其銀四萬餘兩向係各州縣開銷修倉鋪墊水陸腳價及漕南書吏飯食等項之用頗爲浮冒今改徵折

色各州縣毋庸開銷應飭全解糧庫亦可補苴兵餉
此則於節省之中寓籌備之意於民無損而於公有
益者也從前兌運北漕糧船旗丁水手於屯運例款
不敷之外州縣向有津貼名爲兌費今若一併裁革
將來河運疏通勢必有礙兌運擬將此項兌費暫提
充餉俟開兌北漕仍歸丁船津貼約計提銀七萬餘
兩此則因其所固有畱其所不可無於目前有益而
於日後無損者也又隨漕淺船軍三安家幫津資役
等款改折停運俱無庸開支又可提存銀十二萬餘
兩凡此漕務情形經臣通盤籌算極力減除爲民間

省去錢一百四十餘萬串爲國帑實得銀四十餘萬兩又得節省提存銀三十餘萬兩以今視昔漕務利弊較然可覩至於州縣書差僅徵飯食辛工紙張原難責以枵腹從公然又何至如前此之十倍百倍漫無限制卽現在收數旣已痛加刪減而道府漕規及上下衙門一切冗費又復悉行革除計州縣尙可稍資辦公斷不至藉口賠累別開浮勒詐索之端臣旣已訪察積弊去其太甚取一百餘萬之中飽以分益乎上下已往之愆尙可不究後來之弊法必從嚴萬一不肖州縣託名冗費恣意浮收必應從重懲辦

以厲其餘此則目前之整飭非難而日久之防閑尤
所宜慎者也現自減定章程之後通省周知小民踴
躍歡呼輸將恐後歷年漕務開徵至次年七月猶事
迫比甚至一二年後尙煩催促本年漕務經此整飭
因民所欲必能提前數月按數催解藉以上紓

聖慮除州縣之陽奉陰違仍前浮收者另摺查參並
俟辦有成效再行奏聞所有辦理漕務大概情形
謹附片據實密奏

特參抽取漢川縣釐金知縣疏
十二月初六日
竊查湖北自軍興以來支用浩繁遵奉奏準章程

抽釐助餉自應嚴禁官吏之中飽以資軍國之大計
前因代理漢川縣事候補縣丞曹福增私設釐金小
局四十七處經臣於上年甄別案內奏參奉旨

革職在案接任之員宜如何潔已自愛力濟時艱詎
署漢川縣知縣張到任半年僅據報解北岸大

營并武昌總糧臺三千七百七十七千零五十文查
漢川爲襄河往來要道商賈絡繹訪聞該縣各卡每
月可收釐金錢六七千串乃半年之久僅解三千七
百餘串霄壤懸殊顯有欺飾當將張撤任札飭

該管漢陽府知府如山澈底清查詳報去後嗣據如

山呈到清摺內開據張

稟稱自咸豐六年十月

十一日到任起至七年四月初七日撤任止計六箇月共收釐金錢二萬五千二百串又稱解過錢七千三百串查張

僅解釐金錢三千七百七十七串

零其餘解交何處有無迴照應飭稟明又稱奉文撥給團練局錢四千二百串係奉何處明文發交何人承領已屬冒濫又稱開支釐金局經費錢四千八百串查張

任事半年解數僅三千七百串何以開

支局費至四千八百串之多尤爲捏飾又稱支應兵勇口糧錢三千一百餘串是否奉文應付亦未造冊

稟報又稱奉文撥給管理浮橋哲守備錢四百串係奉何處明文礙難準銷又稱被李光榮游勇劫去錢七百串又稱掣獲孝感縣匪徒賞錢三百串均屬無據之詞例不準銷之款又張 自認挪用錢四千

三百餘串撤任後僅據繳呈糧臺總局錢二千串其餘延不呈繳 臣查張 撤任後經 臣遴委官紳前

往漢川縣抽釐檄令徑解糧臺司道彈收並冊報督撫衙門并總局查考不準再經州縣書差之手計自四月十五日起至十月止共報解糧臺總局錢七萬餘串銀五千六百餘兩歷時未及八月約計得釐金

八萬餘串較之張

經手六箇月僅收錢二萬五

千串者已不止三倍之數是其不實不盡已可概見

况張

於二萬五千串之內僅止批解三千七百

餘串迨經撤任查追又僅補繳二千串是其任意開
報殊昧公爾忘私之義據藩臬兩司轉據該管道府
揭參前來相應請

旨將前署漢川縣事揀發知

縣張

卽行革職以便調查帳據提同經手人等

澈底訊明是侵是挪照數追繳究辦仍查明任內倉
庫各款有無虧挪情弊另行辦理外所有署漢川縣
張

經手釐金延不批解緣由謹會同總督臣官

文恭摺具 奏

上諭胡林翼奏參抽取溢金延不批解之知縣請旨革追
一摺 張 著卽革職交胡林翼提同經手人等澈
底訊明照數追繳按律懲辦以儆官邪欽此 十二月二
十三日接奉

勘明各州縣衛被淹情形乞分別緩徵疏十二
月十五日

竊查錢漕之弊在於捏報災荒捏報之弊由於查勘
不實湖北武昌漢陽安陸德安荊州荊門各府屬州
縣濱臨大江襄河以上鍾隄潰口未修每遇夏秋水

漲低窪田地不無被淹州縣顧惜考成惟恐錢糧徵
不足數每每捏報災荒藉緩徵以寬免處分甚至名
雖請緩實則私徵侵蝕騰挪任意顛倒積習相沿幾
於牢不可破本年各州縣稟報被淹臣等督同司道
特定章程責成該管道府親詣確勘原稟稍有捏飾
立時更正由道府加結詳報仍由臣等核駁覆勘有
一州一縣駁至三四次五六次甚至七八次者不憚
煩瑣務使所報區畝界限分明被淹情形輕重確實
臣又密委賢員分往各屬逐處查勘訪問土人以期
辦理核實一洗從前積習庶於國計民生均有裨

益茲據該管道府節次詳晰更正較原稟請緩數日
有由重改輕者有刪減一半及減過半者有全行刪
減者臣等悉心覆核參以訪問似不至再有虛捏所
有前據嘉魚漢陽漢川黃陂孝感沔陽鍾祥京山潛
江天門雲夢應城江陵公安石首監利松滋枝江並
荊門等州縣或因江水泛漲或因襄水陡發或係頻
年積淹陸續稟報均經疊次嚴駁由該管道府周歷
披淹地方及屯坐各屬軍屯田畝勘明輕重實在情
形除原稟照常徵收並涸復及更正之處仍卽催徵
外實勘得嘉魚縣廣賢淨居左湖宣化清洪受澥豐

義上懷等八里共三十七甲並上洲中洲傅洲傍洲
護洲還洲小洲上截洲下截洲等九洲內越塘等二
十八處上屯中屯傅屯田屯白屯大屯小屯東屯牛
屯等九屯內斗塘等二十三處本年入夏以後江河
水漲被淹秋成失望情形次重漢陽縣菱角湖等八
里夏秋江水盛漲田禾被淹涸復不能補種情形次
重漢川縣喝城等三十二垵畝因上游鍾祥縣獅子
口潰口未築水勢下注常年淹灌情形較重又南湖
上官等二十一垵畝亦被帶淹收成歉薄情形較輕
黃陂縣淤洲等六社地勢低窪通江臨湖本年夏秋

江水倒灌被淹情形較重大嘴等二百二十三社雖
係被淹涸出較早尙可補種情形較輕孝感縣尙文
等十九會地勢低窪田禾淹沒不能補種情形次重
仁壽等一百八十三會畧有補種情形較輕沔陽州
梅公等七十二垸濱臨通城銅城各湖地勢最低閒
有涸出情形次重金馬等三百二十九垸涸出較早
尙可補種情形較輕鍾祥縣楊林等三村莊龍山觀
等八十村莊隄工潰口後已成積淹情形次重桃園
等三村莊孫家集等十一村莊被淹後稍有補種情
形較輕京山縣高集等三十七團地勢最低自鍾祥

縣隄潰未築歷年被淹節候已遲難期補種情形次
重又聶家灘等二十五團並各流等二十七團水退
較早補種雜糧情形較輕潛江縣文慈等十二垸地
勢低窪夏秋雨水過多涸出太遲不能補種情形次
重泥伏崔家等六十六垸涸復稍早情形較輕天門
縣關廟等一百一十一垸濱臨河岸頻年鍾祥潰口
漫淹本年又復淹灌情形較重魯巷等十五垸亦係
積淹間有涸出稍資補種情形次重雲夢縣永保等
六會地勢低窪因府河水漲漫淹不能補種情形較
重又彭家等三會地勢稍高水退補種情形較輕應

城縣葉嘴等九團地勢低窪獅子潰口之水建瓴而下不能疏消補種情形較重樸林等十一團夏汎水淹涸復後稍資補種情形較輕江陵縣虎渡汎麻家等三十四垸西支隄漫潰未修水衝沙壓情形較重李家埠等九十垸亦係積淹稍有涸復情形次重田家等四十六垸涸復補種情形較輕公安縣毛一等四里及西一等十里內三十七甲地勢低窪夏秋江水漫淹情形較重板半等六里及西一等十里內十三甲涸復後稍資補種情形較輕石首縣民旺等十七坊垸同一都等十四坊垸內三十五甲因逼近馬

林工潰口夏秋閒江水灌淹涸復已遲情形較重梅
肇垸及一都等坊垸內二十一甲前雖漫淹早經涸
出補種雜糧菜蔬尙獲有收情形較輕監利縣崇林
等三十七垸係頻年淹潰之區車林等六十二垸地
勢極低水由沔屬洪湖倒灌漫淹耕穫失時情形較
重南雷洲等一百七十二垸涸復尙早得資補種情
形較輕松滋縣中二等都內二十八甲及下二等三
都地勢低窪夏秋閒水由江陵西支三節工潰口灌
入不能疏涸情形較重中二等都內二十二甲及上
五等四都被淹後稍資補種情形較輕枝江縣涖浮

等六洲悉濱江岸地勢低窪夏秋水淹不能補種情形次重福星等十二洲坵地勢稍高涸復補種情形較輕荊門州游家湖等二十九區緊依湖港地勢低窪本年夏汎江水漲發補種已遲情形次重馬上三等十三圖消涸後畧有補種情形較輕以上各州縣民田並屯坐各衛軍田情形均屬相同賴本年麥收尙稔或補種雜糧或捕魚爲業得贍生計勘不成災所有應納咸豐七年銀米隄開河費蘆課閒丁租餉並應帶徵六年銀米等款請分別緩徵遞緩以紓民力開列坵區村莊名摺由藩司馬秀儒署糧道張曜

孫議詳請 奏前來 臣等伏查州縣如遇水旱災傷例應勘明分數分別展緩本年湖北各州縣被淹田地業經 臣等核駁覆勘疊次更正雖均勘不成災然皆耕穫失時收成歉薄自應分別緩徵遞緩以廣

皇仁而蘇民困除本年漕糧另摺請 旨外合

無仰懇 天恩俯準將被淹較重之漢川縣喝城

等三十二垸販黃陂縣淤洲等六社天門縣關廟等一百一十一垸雲夢縣永保等六會應城縣葉嘴等九圍江陵縣虎渡汛麻家等三十四垸公安縣毛一等四里及西一等十里內三十七甲石首縣民旺等

十七坊垸同一都等十四坊垸內三十五甲監利縣
崇林等三十七垸車林等六十二垸松滋縣中二等
都內二十八甲及下二等三都各應徵新賦錢糧南
米隄閘河費閒丁租餉等項一併緩至來年秋後限
一年帶徵其原緩六年銀米等項緩至九年秋後帶
徵又被淹次重之嘉魚縣廣賢等八里共三十七甲
並上洲等九洲內越塘等二十八處上屯等九屯內
斗塘等二十三處漢陽縣菱角湖等八里沔陽州梅
公等七十二垸孝感縣尙文等十九會鍾祥縣楊林
等三村莊龍山觀等八十村莊京山縣高集等三十

七團潛江縣文慈等十二垸天門縣魯巷等十五垸
江陵縣李家埠等九十垸枝江縣洄浮等六洲荊門
州游家湖等二十九垸各應徵本年南米照常徵收
請將本年新賦銀兩緩至來年秋後限一年帶徵其
原緩六年銀米等項緩至九年秋後帶徵又被淹較
輕之漢川縣南湖上官等二十一垸畝黃陂縣大嘴
等二百二十三社孝感縣仁壽等一百八十三會洧
陽州金馬等三百二十九垸鍾祥縣桃園等三村莊
孫家集等十一村莊京山縣聶家灘等二十五團並
各流等二十七團潛江縣泥伏崔家等六十六垸雲

夢縣彭家等三會應城縣樸林等十一團江陵縣田家等四十六垸公安縣板半等六里及西一等十里內十三甲石首縣梅肇垸及一都等坊垸內二十一甲監利縣南雷洲等一百七十二垸松滋縣中二等都內二十二甲及上五等四都枝江縣福星等十二洲垸荊門州馬上三等十三圖各應徵本年錢糧南米等項照常徵收其原緩六年銀米等項緩至來年秋後帶徵以紓民力其武昌等衛被淹屯田應緩銀兩均照屯坐各州縣一律辦理又德安府屬之雲夢應城二縣上年專案奏明上忙地丁錢糧除已徵外

其餘未徵銀兩一律緩至七年秋後帶徵荷蒙

俞允存案本年被淹地方如在上年奏準緩徵內者除本年聲明徵新緩舊照案辦理並上年緩徵地畝內有本年被淹請緩新賦者舊欠照例遞緩外其餘一律飭令照常帶徵此外本年請緩各屬所有五年以前原請遞緩帶徵者仍照奏案歸於善後案內分別辦理至六年奏明成災之處分限兩年帶徵者均以次遞緩又黃州府屬之黃岡廣濟黃梅蘄州蘄水等州縣夏間皖匪上犯有無被擾被淹較重之處現在另行飭查分別辦理又江夏漢陽二縣應請

豁免楚課門攤錢糧因係被擾情形未便彙入被淹
案內另行附片陳 奏除飭取各屬垸區地名應緩
銀米照例咨明辦理外所有勘明各州縣衛民屯田
地被淹歉收各處輕重情形分別緩徵錢糧南米等
項緣由理合恭摺具 奏

再本年各州縣衛被淹田地應完錢糧漕米業經 臣
等分別輕重情形另摺 奏明請緩查江夏縣每年
額徵楚課銀四千一十九兩有零漢陽縣每年額徵
居仁由義循禮等坊並鶩公口上屯門攤地課等錢
糧銀一千三百六十餘兩該二縣係附郡首邑迭遭

兵燹居民遷徙流離房屋被燬現雖漸次歸徠廬舍無力修葺多係搭蓋簷棚棲止地基空曠城外復經官兵開挖壕溝困苦情形實堪憫惻據署江夏縣知縣艾澍美署漢陽縣知縣吳瑛稟經該管道府查勘屬實請將本年江夏縣應徵楚課在於被擾尤甚之崇通及近城之稍水等屯房基銀內豁免十分之一銀四百兩又請將本年漢陽縣應徵門攤地課錢糧於被擾尤甚之居仁由義崇信等坊門攤銀一百三十五兩七錢九分九釐地課銀六百一十一兩一錢一分一併豁免餘仍照常徵收由布政司馬秀儒具

詳請

奏前來

臣

等覆查粵匪竄擾湖北武昌三陷

漢陽四陷蹂躪更甚於他處現在居民房屋無力修

葺瓦礫荆榛地基空曠并有開挖濠溝處所民閒困

苦情形皆

臣

等所目擊合無仰懇

天恩準將江

夏縣應徵咸豐七年楚課在於崇通稍水等屯內豁

免銀四百兩漢陽縣居仁由義崇信等坊應徵咸豐

七年門攤地課錢糧銀七百四十六兩九錢九釐一

併豁免以廣

皇仁而紓民力餘仍照常徵收除

飭開具花名細數並取其印結存卷外所有陳請豁

免江夏漢陽二縣楚課門攤地課錢糧各緣由謹附

片具奏

上諭官文胡林翼奏勘明各州縣衛民屯田地被淹懇恩
分別緩徵錢糧南米一摺另片奏請豁免江夏漢陽二
縣楚課門攤地課錢糧等語 該督撫卽刊刻謄黃徧
行曉諭務使實惠及民毋任吏胥舞弊用副朕軫念災
區至意餘著照所議辦理該部知道欽此

勘明各州縣被淹田地請分別緩徵疏 十二月
十五日

竊照道光二十七年準戶部咨嗣後蠲緩漕糧於地
丁摺外另行具摺候 旨遵辦等因在案查湖北

漢陽安陸德安荊州等府屬州縣濱臨大江襄河以上鍾隄潰口未修每遇夏秋水漲低窪田地不無淹灌例準緩徵糧賦遞緩帶徵州縣勒折浮收猶慮徵不足數每每捏災枉緩希圖寬免處分甚至藉緩私徵侵蝕騰挪任意顛倒積習相沿牢不可破以致正供日虧民生益困本年臣等於各屬稟報被淹督同司道特定章程責成該管道府親詣確勘原稟稍有捏飾立時更正由道府加結詳報仍由臣等核駁覆勘有數至三四次五六次甚至七八次者復又密委賢員分往各屬逐處查勘訪問土人以期核實一洗

從前積習庶於 國計民生均有裨益茲據該管道
府節次詳晰更正有較原稟請緩數目刪減一半者
有減過半者有全行刪減者 臣等悉心覆核參以訪
問似不致再有虛捏所有前據黃陂天門雲夢應城
江陵公安石首監利松滋等州縣或因江水泛漲或
因襄水陡發或係頻年積淹陸續稟報均經迭次嚴
駁由該管道府周歷被淹地方勘明輕重實在情形
除原稟照常徵收並涸復及更正之處仍卽催徵外
實勘得黃陂縣淤洲等六社地勢低窪通江臨湖本
年夏秋江水倒灌被淹情形較重天門縣關廟等一

百一十一垵濱臨河岸頻年鍾祥潰口漫淹本年又復迭淹情形較重雲夢縣永保等六會地勢低窪因府河水漲漫淹不能補種情形較重應城縣葉嘴等九圍地勢低窪獅子潰口之水建瓴而下不能疏消情形較重江陵縣虎渡汛麻家等三十四垵因西支隄漫潰未修水衝沙壓情形較重公安縣毛一等四里及西一等里內三十七甲地勢低窪夏秋水漫被淹情形較重石首縣民旺等十七垵同一都等十四坊垵內三十五甲因馬林工潰口被淹涸復已遲情形較重監利縣車林等六十二垵地勢極低水由沔

屬洪湖倒灌情形較重又崇林等三十七垸係頻年積淹註緩之區松滋縣中二等都內二十八甲及下二等三都地勢低窪由江陵西支三節工潰口灌淹情形較重以上各州縣被淹田地賴本年麥收尙稔或補種雜糧或捕魚爲業得贍生計勘不成災所有應納咸豐七年漕糧並應帶徵六年漕米等款請分別緩徵遞緩以紓民力開造垸區村莊名摺由藩司馬秀儒署糧道張曜孫會詳請 奏前來 臣等查本年各州縣被淹田地疊次核駁覆勘更正雖均勘不成災然皆耕穫失時收成歉薄至被水各屬內有監

利積淹及江陵監利二縣挖壓田地係於道光二年
十年先後奏奉

諭旨準其緩徵應仍照案計緩

其餘勘明被淹田地自應分別緩徵遞緩以廣

皇仁而蘇民困除本年錢糧南米另摺請

旨外

合無仰懇

天恩準將被淹較重之黃陂縣淤洲

等六社天門縣關廟等一百一十一垸雲夢縣永保

等六會應城縣葉嘴等九團江陵縣虎渡汛麻家等

三十四垸公安縣毛一等四里及西一等里內三十

七甲石首縣民旺等十七垸同一都等十四坊垸內

三十五甲監利縣車林等六十二垸又積淹之崇林

等三十七垵松滋縣中二等都內二十八甲及下二等三都各應徵本年漕糧均緩至來年秋後限一年帶徵其應帶六年漕糧展至九年秋後帶徵又雲夢應城二縣上年專案 奏明漕糧除已徵外一律緩至七年秋後帶徵荷蒙 俞允在案查上年緩徵

漕糧如在本年被淹請緩內者舊欠照例遞緩其餘應完本年及應帶六年漕糧仍飭照案催徵此外本年請緩各屬所有五年以前原請遞緩帶徵者仍照 奏案歸於善後清查案內分別辦理至六年 奏明成災之處分限兩年帶徵者均以次遞緩所有勘

明成豐七年各州縣被淹田地緩徵漕糧緣由理合
恭摺具奏

上諭官文胡林翼奏勘明各州縣被淹田地請將漕糧分
別緩徵一摺該督撫卽刊刻謄黃徧行曉諭務使實
惠均霑毋任吏胥舞弊用副朕軫念歉區至意餘著照
所議辦理該部知道欽此

按年分別造報奏銷疏 十二月二十七日

竊查各省庫款歲一奏銷所以杜虧空嚴考成也湖
北自咸豐元年查辦之後二年四年五年粵匪竄擾
省城司道庫款被劫文卷燬失現任藩司馬秀儒於

五年十一月在襄陽行次到任署糧道張曜孫於五年十二月在荊州行次到任其時省城未復庫款銀米多係撥作軍需額支致多欠發挹注轆轤款目紛繁查辦極難措手經臣等於本年二月三十日將咸豐二三四五六年錢漕銀米雜稅之奏銷考核冊籍奏明俟接到部抄案冊之卽再行設局辦理在案惟八年又須查辦七年報銷例限迫近而自二年以至六年中間軍需絡繹司道頻更各屬徵解錢漕銀米雜稅等項均未截數有無侵蝕挪移雖無卷冊可稽亦須設法查辦未便再事稽延竊維銷算以收支

爲大綱款目因清查而覈實武漢克復之後臣等揀
派司道大員於省城設立清查總局並經奏明立
定期期清查完竣茲擬將咸豐二三四五等年司道
各庫收支錢漕銀米等款歸於清查案內分年挨次
查造依限竣事其六年七年藩司糧道均已到任自
應查照舊章統於八年奏銷限內一併造報如此
分別查辦庶頻年之積壓易於清釐近歲之勾稽亦
歸簡捷據布政司馬秀儒署糧道張曜孫會詳前來
臣等伏查錢漕銀米絲粒皆關國帑自咸豐二年
以至五年爲期數載之久各屬完解銀米或撥充額

餉或籌辦軍需並未按年截數頭緒絲紛兼之文案燬失弊竇百出該司道請將咸豐二三四五等年庫款解收支用各數歸於清查案內查造六年七年統於八年照舊造報洵足以昭覈實而期迅速除將該司道申送節略咨明戶部查覈外所有湖北省咸豐二年以後應造各奏銷冊籍現擬按年分別查辦各緣由理合恭摺奏乞天恩飭下部臣迅速議覆並將各案冊鈔頒來楚以便趕緊遵照造報

硃批著照所請迅速查辦欽此

胡文忠公遺集卷二十五終



胡文忠公遺集卷二十六



長沙鄭敦謹

湘鄉曾國荃

編輯

遵

旨籌墊安徽兵餉並調步軍馬隊馳赴

麻羅防剿疏

八年正月十五日督發

咸豐七年十二月三十七日準軍機大臣字寄咸豐
七年十二月二十日奉 上諭李孟羣自克復霍
山進取六安州城於西北兩路疊獲勝仗惟餉需不
繼著王慶雲崇恩於四川山東省各籌銀三萬兩充
日起解惟四川省距皖較遠著官文胡林翼先行籌

銀二三萬兩分起墊解李孟羣軍營俟四川餉銀過楚時陸續扣還歸款又於咸豐八年正月初五日準軍機大臣字寄咸豐七年十二月二十八日奉

上諭本日據李孟羣奏逆匪大股上竄兵力未能兼顧請飭楚北分兵防剿一摺潛太大股粵逆竄入霍山縣城代理知縣王自箬等收復後該匪復由東北竄踞獨山西河口一帶而開順葉家集等處地通商固楚北麻城羅田毗連該處著官文等卽行派撥兵勇出境迎剿或卽將進剿宿太之兵分撥前往各等因欽此寄信前來查李孟羣由鄂援皖所有臣等節

次籌解銀米並上年十二月初六日解銀八千兩均
經先後 奏報在案惟楚軍需用浩繁尤多積欠現
在水師正在料理東征鄰餉愆期邊疆多警支絀情
形更非從前可比而楚皖唇齒車輔大局攸關何敢
稍分畛域茲於各營應發口糧勻提銀一萬兩於正
月初五日徑解李孟羣軍營交收其川省籌解該藩
司餉銀現已將次到楚惟爲數僅一萬兩臣等先其
所急未卽扣還仍卽起解擬俟次批到楚再行截扣
庶該藩司得濟急需卽軍事多所裨益至鄂居天下
之中道途四達河南江皖密邇賊氛卽如黃州一府

所屬蘄水蘄州黃梅廣濟麻城羅田等州縣均接壤
皖豫而一縣之中又復路徑紛歧防不勝防上年皖
賊上犯蘄黃等處蕩之後於邊陲要隘節節設備
未敢稍形鬆懈前聞皖逆勾結捻匪擾近商固當卽
添集兵勇赴麻城一帶防堵茲奉 廷旨訓示周

詳查都興阿等兵力太單無可分撥而九江城賊亟
欲挺而走險尤須遏其上竄茲已飭調九江步軍三
千名前駐襄陽舒保馬隊二百名兼程馳赴麻羅扼
要防禦以固楚疆相機進剿總期楚皖聲勢連絡迅
掃賊氛以仰副 聖主綏靖疆圉之至意所有籌

墊安徽軍餉並調九江步軍襄陽馬隊馳赴麻羅防
剿各緣由謹合詞恭摺具 奏

奏陳湖北歷年團練出力擬請分別增廣學額
疏 正月十五日督發

竊查湖北軍興以來用兵已逾五載賊氛飄忽竄擾
無常官兵隨處分剿實有顧此失彼之虞往往資本
地團練以爲攻守之助自六年十一月武漢克復七
年夏間賊匪復由皖界分竄蘄黃官軍屢獲大捷賊
氛遠遁全省肅清此固由 皇上天威將士用命
所致而各州縣紳民團練捍禦之功正有不可泯沒

者臣官文前在荊州將軍任時省城失守賊由襄河
竄擾其時襄河兩岸之沔陽天門潛江京山鍾祥等
州縣團練頗能防禦其中沔陽州團勇最著尤能屢
挫賊鋒不至由襄樊北竄而荊州府屬之江陵縣團
練聲威極壯四年四月賊匪竄逼沙市經官兵與團
勇合力攻擊有龍會橋高家場之連次大捷復經松
滋枝江監利團練整齊賊卽敗遁七年二月襄陽土
匪竄踞宜昌荊州大震沙市各團練日夜同官兵防
守土匪聞風回竄未敢犯境又襄陽府屬之均州宜
城南漳穀城光化棗陽等州縣連年團練防守最密

襄陽土匪滋擾各屬團勇均皆得力旋即撲滅又五年九月臣由安陸一路進剿其德安府屬之隨州應山應城雲夢漢陽府屬之黃陂孝感等州縣團練均能助剿而隨州團勇數萬人尤爲出力同官軍克復隨州州城協同攻克德安郡城孝感等邑之團勇自二年以至五年日與逆賊相爭捍禦始終不怠臣胡林翼自咸豐五年二月署理湖北巡撫駐師南岸日事攻剿其時武昌府屬之江夏武昌大冶蒲圻咸甯嘉魚興國等州縣團練俱能固守盤查奸細偵探賊蹤與官軍爲聲援去年五月臣由黃州下剿查明黃

州府屬之黃岡蘄水麻城黃安蘄州羅田等州縣紳民團練自二年賊擾以來卽能協力齊心與賊相拒夏閒巴河月山等處之捷亦深資其力而羅田地連豫皖前曾越境立功尤爲奮勇此湖北各州縣厯年團練出力之實在情形也臣等久在戎行深知楚北當賊氛迭擾之時各州縣紳民深明大義志切同仇與官軍聯絡戰雖不足而守實有餘固不能使賊畏懼不來而實能使賊懷疑莫定裹糧持樵之眾各邑油然奮興以助官軍之勢者功正不小統計數年來各州縣團練紳民爲賊所傷捐軀亡命者何止數萬

人已由臣等另案查明分別請卹在案其中有從戎效力勞績最著者雖迭經臣等擇尤保奏上沐恩施而各州縣團練或數千人或數萬人其中舉貢生監職員等每縣多至二三百人少亦百人雖不敢皆濫行剡薦而出力紳民若不乞恩推廣

皇仁亦屬向隅臣等與司道悉力籌議現在薄皖臨吉賊蹤緊逼仍須隨地設防以助官軍之不逮自應設法獎勵以服眾志而勵人心伏查咸豐六年十月十三日安徽撫臣福濟奏遵復擬辦實行團練章程一摺奉 上諭辦團各紳其有情殷報效者或

加學額或卽獎敘均著照所擬辦理等因欽此仰見

皇上天恩周渥鼓勵團防之至意臣等竊以湖

北紳民辦理團練俱係捐籌經費自備口糧其助勦
協防肅清疆土較之安徽已有成效而獎勵之典尙
未舉行擬酌加學額而推廣尤爲普遍因是據實瀝
陳伏乞 皇上俯念湖北歷年團練出力眾志成

城準將湖北武昌府屬之江夏縣武昌縣興國州均
加文武學額各一名大冶縣咸甯縣蒲圻縣嘉魚縣
均加文武學額各一名漢陽府屬之沔陽州孝感縣
均加文武學額各三名黃陂縣加文武學額各二名

黃州府屬之黃岡縣蘄水縣麻城縣黃安縣均加文
武學額各二名蘄州羅田縣加文武學額各一名荊
州府屬之江陵縣加文武學額各三名松滋縣枝江
縣監利縣各加文武學額各一名襄陽府屬之均州
棗陽縣南漳縣均加文武學額各二名穀城縣宜城
縣光化縣均加文武學額各一名安陸府屬之鍾祥
縣天門縣京山縣均加文武學額各二名潛江縣加
文武學額各一名德安府屬之安陸縣加文武學額
各二名隨州加文武學額各三名應山縣應城縣均
加文武學額各二名雲夢縣加文武學額各一名自

咸豐八年爲始歲科兩試一體遵行永增定額庶幾
楚北團練紳民其身著敵愾之勤而其子孫世受芹
藻之報 恩至溥而無所遺 澤極周而不爲

濫不惟有以勵團練之氣而楚北之士風亦將蒸蒸
日上矣再各州縣紳民尙有捐輸銀錢以資團練經
費甚鉅未及請獎並實在殺賊守城立功擇其尤者
容臣等查明分別等第另請獎敘合併陳明所有湖
北各州縣歷年團練出力紳民擬請分別增廣學額
緣由謹會同湖北學臣馮譽驥合詞具奏

上諭官文胡林翼奏紳民團練出力請分別增廣學額以

昭激勸一摺湖北省自軍興以來各州縣紳民籌備經費辦理團練與官軍聯絡聲威戰守均能得力實屬深明大義志切同仇現當闔境肅清自應優予獎勵加恩著照所請所有武昌府屬之江夏武昌興國三州縣均著加文武學額各二名大冶咸甯蒲圻嘉魚四縣均著加文武學額各一名漢陽府屬之沔陽州孝感縣均著加文武學額各三名黃陂縣著加文武學額各二名黃州府屬之黃岡蘄水麻城黃安四縣均著加文武學額各二名蘄州羅田縣均著加文武學額各一名荊州府屬之江陵縣著加文武學額各三名松滋枝江監利三

縣均著加文武學額各一名襄陽府屬之均州棗陽南
漳三州縣均著加文武學額各二名穀城宜城光化三
縣均著加文武學額各一名安陸府屬之鍾祥天門京
山三縣均著加文武學額各二名潛江縣著加文武學
額各一名德安府屬之安陸縣著加文武學額各二名
隨州著加文武學額各三名應山應城二縣均著加文
武學額各二名雲夢縣著加文武學額各一名自咸豐
八年爲始歲科兩試一體永遠遵行以爲情殷敵愾者
勸餘著照所議辦理該部知道欽此

再上年十二月初八日江西臨江府克復餘匪由瑞

州一帶竄逃臣等調撥省標信中信左信後勇丁並
調馬隊分途迎剿復飭礮船分起南岸堵截仍飛咨
湖南撫臣一體嚴防該匪挺而走險由德安瑞昌竄
入與國經代理知州向先薰會商候補知府邢高魁
在籍給事中陳光亨齊集團練扼要防守並經浙江
藩司李續賓派兵千六百人於十二月二十五日出
瑞昌兼程上援是日午刻九江兵勇先期馳至經候
補副將周寬世候選知縣蕭積仰向先薰等督率馬
步四面兜圍賊壘賊卡登時踏平殺賊一千餘名淹
斃無數餘賊僅贖二百餘名梟水逃遁連日復經該

州官紳督飭村莊團練陸續擒獲網送一百餘名均
卽正法此股竄匪殲除殆盡不致再畱餘孽卽登時
撲滅地方未遭蹂躪所有臨江敗匪竄至楚境隨卽
殄滅淨盡各緣由謹附片具 奏

奏陳豫匪竄擾光固調軍先期移駐麻城酌量
防剿疏 正月二十日督發

竊準軍機大臣字寄咸豐八年正月初三日奉

上諭英桂奏南路剿匪及光固喫緊各情請飭舒保
會剿並暫畱過境吉林黑龍江餘丁一摺現在豫境
之唐縣桐柏及楚境之隨州棗陽山路叢雜本有匪

徒出沒若再被該匪踞險負嵎搜捕殊形棘手英桂
已飭德楞額會同邱聯恩進剿尙恐未能得力舒保
帶兵現駐襄陽著官文胡林翼飭令該營總就近移
兵由隨州棗陽與河南將弁前後夾擊以期盡掃匪
蹤至六安及光州所屬地方均有賊匪滋擾需兵甚
急所有赴楚補額之吉林黑龍江餘丁四百名現在
路過許州著英桂暫行截留以資助剿俟東路軍情
稍鬆仍飭該餘丁赴楚補額將此由六百里各諭令
知之遵
旨寄信前來臣等查前因皖逆勾結捻
匪擾近商固毗連湖北麻城一帶欽奉
寄諭派

兵出境迎勦卽經臣等飭調九江步軍三千前駐襄陽舒保帶馬隊二百名馳赴麻城羅田一帶扼要防禦相機進勦前已由驛覆奏在案舒保一軍

先期移駐麻城距襄較遠而楚豫交界之隨州棗陽久爲捻匪窺伺臣等預爲籌慮已咨行署提臣訥欽襄陽道毛鴻賓督率所屬整齊團練選派弁兵加意防範并酌留舒保馬隊百名駐襄扼守以資策應而隨州北鄉團練尙爲得力仍察看緩急情形出訥欽等就近派撥兵勇會合河南將弁相機截擊總以嚴固楚疆爲要著使該逆無路狂竄卽豫軍亦易圍剿

以期迅掃匪蹤仰紆

宸厯惟是楚軍得力於馬

隊而血戰數年傷疲實眾亟待西丹到楚補額以資訓練而助征勦今英桂截留之請已蒙

恩允楚

豫事同一體原無畛域可分祇以楚省越境征勦倍形艱鉅不特圍攻九江進勦宿太均難鬆勁且舒城六安張家塆地處髮逆捻匪多方勾結竄擾無定與楚疆接壤之區頭頭是道防不勝防臣都興阿因馬隊單薄焦灼萬分屢經咨催吉林黑龍江西丹迅速到營况此項西丹初次來南地利不熟語言不通漢文不曉尙須妥爲駕馭歸隊訓練方成勁旅臣等現

已咨商英桂將原調赴楚之西丹四百名內以二百名截留豫省以濟急需以二百名來楚歸大隊安爲訓練刻下楚軍水陸馬步全抵江皖而急切未能遠征實因九江功虧一簣上游重鎮攸關尤當奮力攻擊迅圖收復臣等愚見一俟九江得手除分援江省外其餘楚軍專力豫皖先清長江北路而防竄擾較爲上策即前項西丹訓練得力均仍爲豫皖助征之用庶於彼此軍務大局方有裨益除吉林西丹百名現已到楚仍咨催英桂將黑龍江西丹再撥百名飭令原帶之員趕緊起行來楚外所有奉到

諭旨

分別籌辦情形謹繕摺由驛六百里覆 奏伏乞

皇上聖鑒訓示

再楚省北岸馬步各軍進駐宿太且剿且守雖楚境幸臻安堵而皖逆出沒無常屢圖上犯臘月三十日正月初一二等日太湖逆眾數千乘我兵度歲之隙竄近蘄州邊界臣官文等預料該逆有此詭謀密飭各軍多方準備經管帶訓勇之湖北糧道唐訓方會合各路兵勇分投擊退初七日宿松股匪又竄近蘄州邊界之荆橋好漢坡等處築壘抗拒臣都興阿當飭鮑超五營按兵靜守又派巴依爾呼蘭同石清吉

劉元勛等營各率五成隊伍赴宿松官營駐守而以多隆阿帶精選開化等三營步隊同四起馬隊至二十五里墩迎剿大股逆眾初八日該逆至仙田鋪聞我兵出隊而退初九日黎明賊眾三千餘突至風火山我軍分路列隊鏖戰良久賊仍死拒多隆阿率馬隊分兩翼繞出賊後鎗箭齊發斃賊多名餘逆奪路狂竄我軍馬步圍剿直追至太湖城邊沿途殺賊四五百生擒長髮騎馬賊三十餘名正法十一日進剿好漢坡桃花鋪檜楓梢劉家塘分茅嶺走馬岡等處賊巢我軍分三路直前該逆抵敵不住沿山逃竄兵

勇追殺三十餘里斃賊千餘名內有黃衣騎馬賊二十餘名又生擒長髮賊百餘名訊供正法先後奪獲礮械無算十二日午刻收隊回營查點兵勇亦有受傷卽分別驗明同出力員弁人等另行 奏請獎卹惟疊訊生擒賊供太湖渡船口石牌等處約計賊七八萬連營三十餘里仍飭各軍相機剿辦等情咨報前來除仍激勵將士奮勉圖功務期尅日會合皖軍盡殲醜類仰紓 慈懷所有節次剿退宿太逆匪上犯連獲勝仗情形謹附片陳明

再水師副前營哨官守備銜藍翎儘先千總方學禮

於咸豐七年十月十四日在彭澤縣打仗陣亡又新
右營哨官藍翎千總已保儘先守備李長清於十一
月十七日在九江打仗陣亡由福建陸路提督楊載
福咨報前來等查該二員攻城破壘臨陣捐軀深
堪憫惻合無仰懇 天恩俯準敕部均照守備例
議卹以慰忠魂理合附片陳 奏
硃批均照所請議卹欽此

恭謝

天恩疏 正月二十二日

竊 臣 於上年十二月二十六日接準驛遞

恩賜

御書福字一方藍瓣大荷包一對小荷包二對

銀錢二箇銀鏤四箇杞果三觔藕粉七觔百合粉七觔南棗七觔蓮子三觔奶餅十觔挂麪二十把

頒賞到

臣

謹卽望

闕叩頭祇領訖伏念

臣

猥以駑

材忝膺重寄荷

恩慈之疊沛慚報稱之毫無茲

逢鳳律韶回復荷

龍綸

寵錫仰

皇仁

之仁萬類熙春臺而匝地臚歡普

禔福以福庶

民捧

寶墨而自

天錫祉銀花煥色綺佩縈

輝

錫珍品於

上方沐

醲膏之下逮撫

衷循省榮感莫名臣惟有益勵戎行倍勤吏治愼楚疆之戰守遍九陲而風靜參旂瞻虞陛之光華

拜

十賚而心依

斗極

襲實州縣可用人員疏

正月二十二日

竊準吏部知照咸豐六年二月初九日內閣奉

上諭現在江蘇安徽江西湖北湖南廣西貴州各省

正當辦理軍務之際著該督撫於所屬各員中秉公

察看如有官聲才具堪勝道府之任者著各酌保數

員以備簡放欽此

臣

等伏查安民在於察吏爲政首

重得人

臣

等謬膺疆寄於州縣中畱心察訪無日不

以舉直錯枉爲念以期吏治日有起色茲查有候補

同知黃昌輔歷任嘉魚應城荆門各州縣才識優長

循聲素著民情極爲愛戴候補知縣林之華守潔才
優愛民如子歷任興國通城宜都武昌各州縣官聲
卓越候補知縣鍾謙鈞廉正自矢辦事勤懇歷任沔
陽州同各缺當賊氛逼擾之時團練士民結實可靠
各屬被難民人趨依若市丁憂回籍經臣等奏聞
差委籌辦軍餉潔已奉公民情悅服以上三員實係
勤能廉潔於通省州縣中尤爲出色之員合無仰懇
天恩將黃昌輔以知府記名遇有湖北知府缺
出請旨簡放林之華鍾謙鈞均以同知直隸州
仍畱湖北儘先補用似於吏治有所激勸地方益深

裨益再林之華前因經徵南糧議以革職奉

旨

著該督撫出具考語送部引見再降諭旨等因欽此
查該員被議係屬公罪應繳南糧已檄飭清查局藩
司催繳全完再行另案辦理合併聲明臣等爲鼓勵
人材起見謹合詞恭摺具奏

上諭官文等奏遵旨酌保州縣可用人員一摺湖北候補
同知黃昌輔才識優長民情愛戴著以知府交軍機處
記名遇有湖北缺出請旨簡放候補知縣林之華守潔
才優官聲卓越鍾謙鈞潔已奉公民情悅服均著以同
知直隸州仍留湖北儘先補用林之華因經徵餉議一

案仍著該督撫照例辦理該部知道欽此

再湖北軍務分兵江皖水陸並進隨營差委在在需員而地方傷痍之餘亟賴賢良有司加意撫養竊謂地方安危繫乎吏治而州縣表率尤重知府知府得人則吏治蒸蒸日上可臻上理訪有前任四川知府牛樹梅久任州縣循良第一現回甘肅本籍前任湖南衡州府知府李宗壽老成幹練樸實可靠前因丁憂回陝西本籍現已服闋可否懇請 天恩敕下

吏部甘肅陝西督撫 臣 迅飭該二員來鄂差委必能盡心民事有裨地方 臣 等爲軍務省分急需賢才起

見是否有當謹合詞附片具奏

謹按此片於二月二十九日接奉

旨準

奏陳前後抽撥馬步援豫並各路情形疏

十三日

案準軍機大臣字寄咸豐八年正月二十七日奉

上諭前因固始被圍豫省兵力單薄諭令官文等
卽飭舒保帶領馬隊徑赴光固一帶救援茲據該大
臣等奏稱舒保一軍先期移營麻城仍酌量隨棗情
形實力防剿等語自係尙未接奉前旨現在勝保等

援剿固始雖屢獲勝仗尙未解圍仍須添兵助剿舒保此時諒已起程惟所帶馬隊僅二百名不成一軍著官文等酌量情形添撥步隊相輔而行或卽於駐紮襄陽兵內酌撥千名交舒保統帶前進較爲得力另片奏太湖宿松逆匪竄近蘄州邊界經都興阿等督兵迎剿斬獲頗多惟探聞太湖渡船口石牌等處尙有賊黨七八萬連營三十餘里逆勢如此猖獗非下援金陵卽上竄楚境著都興阿督飭各軍相機截剿務將此股逆匪迅速殲除至九江功在垂成何以尙無捷報不勝殷盼現在和春等正在圍逼金陵安

慶蕪湖等處賊黨尙多時往金陵援應所望九江早
克順流而下與江南大軍兩路夾攻使該逆不至他
竄方爲妥善著官文等傳旨令楊載福彭玉麟等奮
勇圖功毋得遷延時日坐失機宜將此由六百里各
諭令知之欽此竊臣等前因賊圍固始並竄擾商城
切近湖北麻城邊界欽奉 寄諭派兵出境迎剿

當卽抽撥九江營勇三千人隨同副都統舒保馬隊
二百名前往防剿業經 奏明在案嗣復添撥駐防
興國之勇丁五百人亦隨同舒保前往現在馬步三
千七百人足成一軍其襄樊步兵不滿千人應請毋

庸再撥昨據麻城縣汪敦仁等報稱前月二十四日
固始官軍大獲勝仗固城業已解嚴惟賊黨分竄商
城東路又據道員孫守信稟報六安賊股亦多上竄
可由長林關雙嶺關等處繞入楚界是商城防範實
爲喫緊該營已於本月初三日由麻城拔營進紮兩
路口地方扼要防剿相機前進查該處山深林複路
徑歧險一切軍裝糧餉轉運爲艱况我軍奮勇而前
賊必反由閒道繞出其後臣等反覆籌思兵事不難
於輕進而深戒其輕退自應步步爲營節節掃蕩乃
無反顧之虞又據九江行營浙江藩司李續賓稟稱

自九江調兵前往麻城之後探聞江西撫州賊黨大股分爲二枝一股竄入都昌欲擾湖口地界希圖偷渡九江爲城賊之援一股聲言竄擾興國以窺武漢刻下湖口守兵征調已空僅餘五百人竭力堅守審察現在情形江西北路甚屬空虛石逆屢思挺而走險仍窺楚境急應嚴飭速清商城等處撤麻城之兵以援湖口方可妥慎無虞而九江爲該逆積年巢穴恃其城堅糧足死守待援經我軍重濠壘布水陸環攻賊已無法飛渡誠如 聖諭功在垂成現探賊糧日缺賊勢日蹙雖堅守不戰已同檻獸釜魚臣等

仍當嚴督各軍四面防剿以期速拔堅城盡殲醜類
尅日長驅東下仰慰宸厯斷不敢坐失機宜所
有現在抽撥馬步兵勇及各路探防實情謹合詞具
摺 奏 聞

再下游北岸馬步各軍進剿宿大股匪先後斬馘不
可勝數而該逆恃其死黨之眾屢圖竄擾楚境正月
二十一二等日賊眾數千進竄彌鎮盤踞逼近蘄界
經管帶訓勇之北糧道唐訓方率義禮正訓等營兵
勇分路夾擊斃賊二百餘生擒六名賊大敗竄逸而
同日復有大股賊首僞地官燕賊紮分茅嶺僞成天

豫陳賊紮它龍山添築營壘兩路賊眾萬餘勢甚猖獗臣都興阿當於二十二日丑刻派翼長多隆阿同

張萬祿帶精選三營並開化勇等步隊又派吉林二
六起黑龍江二起馬隊分路迎勦又派巴依爾呼蘭
馬隊守備常勝步隊伏於各路接應是日辰刻我軍
直趨分茅嶺見該逆漫山遍野吹角搖旗蜂擁而出
鏖戰逾時賊抵死不退多隆阿以步隊當其衝分馬
隊爲左右翼由徑路折出包抄其尾鎗箭齊施殲其
黃衣馬賊二名餘賊大潰我軍乘勝進攻連踏賊壘
十餘座正在沿途追殺忽它龍山股匪由山後抄至

圖襲我後適已依爾呼蘭等趕至接應馬步合力圍剿斃悍賊多名餘逆翻山奔逃我軍追殺十餘里計是日兩路共斃賊千數百生擒八十餘名奪獲大小鎗礮一百餘件旂械無算又偽拱天豫印一顆偽檢點指揮總制軍帥等印三十餘顆等情咨報前來臣等查此次皖逆分股竄擾直欲犯我楚疆軍士踴躍用命連戰大捷洵足以寒逆膽而快人心除仍相機進剿會師東下一面查明出力及受傷官兵另行奏請恩施外謹將迎剿皖賊大獲勝仗情形附片馳陳

請撥漕折等銀資濟軍餉疏 二月十八日

竊照湖北自軍興以來征調頻仍水陸馬步數萬餘
眾支用浩繁除鄰省協濟之外本省地丁鹽課無論
何項正雜錢糧悉以移緩就急多方挹注猶復餉匱
兵飢萬分支絀查北漕停運前準部咨每石以一兩
三錢變價解部湖北有漕州縣除南米解供滿綠各
營兵食北漕額征正耗不過十餘萬石加之被擾被
旱被淹請蠲請緩歷年各屬批解無幾隨時提充軍
餉咸豐七年經臣實力整頓州縣稟報被淹往返駁
查三四次五六次甚至七八次稍有不實立時更正

并將州縣向年浮收數目大加刪減民間完納極形踴躍現在各屬漕折批解道庫者已有成數又漕南水腳及隨漕淺船軍三安家幫津等款亦陸續征存查楚境雖已肅清而江皖河南鄰氛不靖籌防籌剿調集頻仍九江攻剿喫緊望餉急切其援剿江西吉安各軍及安徽李藩司行營節次於無可籌撥之中設法解濟加以製造修船卹賞等項統計每月需餉二十五萬兩而楊載福水師計日東下不獨行糧亟須籌備卽東下之後糧餉軍火仍須取給於楚此外額兵餉項尙未計及是目前之籌畫甚難而日後

之度支更亟本省錢糧課稅牙帖釐金益以鄰餉終
屬入不敷出東南軍務一時未能告竣軍餉積欠愈
久愈多臣與司道日夜籌商實無長策計惟有將漕
糧折價及漕項銀兩暫資接濟以固軍心而維全局
合無仰懇 天恩俯念楚北水陸各軍征勦尙爲

出力準將咸豐七年糧道庫存漕糧折價及漕項銀
兩撥歸軍需項下充作兵餉仍飭糧臺覈實造冊報
銷實於軍務有裨據藩司馬秀儒署糧道張曜孫具
詳前來謹將軍餉支絀請撥七年漕折等銀以資接
濟緣由恭摺具 奏

硃批戶部速議具奏欽此

再儘先都司王玉典湖南善化縣人由長沙協標戰
兵隨副將鮑超勦賊素稱勇敢咸豐七年三月十六
日攻黃梅小池口偽城被大礮子由左膀穿至後臂
骨碎筋斷致成殘廢現已飭令回籍惟該員勦賊以
來水陸各戰無不奮勇當先戰功屢著茲以礮傷成
廢情殊可憫合無仰懇 天恩敕部將該都司王

玉典照實任都司例議給全俸準其在籍支食以資
養贍而示體卹出自 皇上逾格鴻施謹附片具

奏伏乞

聖鑒

硃批兵部議奏欽此

胡文忠公遺集卷二十六終